

華嚴經普賢行願品疏卷七

唐屬賓國三藏般若奉詔譯

澄觀述疏

◎海幢比丘六住章

△第六海幢比丘寄正心住。成就般若，了法性空，無住無依，無邪無正。故聞讚毀，能正其心，念不動故。文但有五。第一依教趣求。第二見敬問答。第三謙己推勝。第四指示後友。第五戀德禮辭。

爾時善財童子一心正念彼長者教，隨順觀察，如說修行。憶持彼不思議菩薩解脫門。思惟彼不思議智慧光明

門。深入彼不思議法界次第門。悟解彼不思議徧入普法門。明見彼不思議如來神變。觀察彼不思議普入佛剎。深信彼不思議佛力莊嚴。照現彼不思議菩薩三昧。了達彼不思議差別世界。修集彼不思議菩薩淨業。發起彼不思議廣大誓願。

如是觀察，漸次南行。向閻浮提畔無垢聚落，周徧尋覓海幢比丘。

今初有二。先念前。後如是觀下，趣後。

△第二乃見處在下，見敬問答。於中二。先見定證入。後起定問答。前中小異上來。謂見定體用，同示法故。文中四。一見入定相。二睹定勝用。三瞻敬證入。四所經時分。

乃見處在經行林側，結跏趺坐。端身正念，離出入息，無別思覺。住不思議廣大三昧。

今初。此通二定。一滅受想定。謂無別思覺，種種心行皆已滅故，唯第八識持身不壞。定前加行誓願力故，令

於定中起諸業用。若依此教，法界融攝，自在無礙，業用無方，未曾起念。今此六住同於六地，能入滅定而起通用。即淨名云，不起滅定，現諸威儀。二即第四禪，以諸起用多依彼故。第四禪中無出入息，亦無覺觀，內淨喜樂諸思覺故。通表此位聞讚聞毀，心定不動。然經行地側，是動之所。而滅思覺，表即動而寂，即用無心。則乾坤倒覆，無謂不靜。洪流滔天，無謂其動。而言側者，不住行故。觀法無相，無體無修，故不住行。若住於行，非真行故。

△第二以三昧力下，睹定業用。文分四別。第一總明現身所為。第二別顯肢分現身。第三通明毛光業用。第四總結令善財睹。

以三昧力，現大神通。於其身上，從頂至足，一切肢分，一切毛孔，悉現無量不思議數同自身相一切身雲。徧一切處現一切身。

今初八行半經，舊經所無。於中分二。先明現身。肢分毛孔，即是總標第二三段。同自身相一句，義生。

為普供養一切如來故。為普嚴淨一切佛剎故。為普成熟一切菩薩故。為普調伏一切眾生故。為普濟拔諸苦蘊故。為普除斷三惡趣故。為普開示人天路故。為普消滅煩惱毒故。為令眾生普入甚深智慧海故。為令眾生究竟安住一切智故。

後為普供養下，明現身意。

△第二從兩足下，別顯肢分現身業用。有十四處，作用不同。從足至頂，漸漸增勝，各表不同。

從兩足下出無數佛刹極微塵數長者居士婆羅門眾相似身雲。首戴華冠，身垂瓔珞。明珠繫頂，被服莊嚴。無量童男以為眷屬。普往十方一切世界。

一足下出長者居士及婆羅門者。足有三義。一最初義。長者行之長故。二者住義。居士安處故。三者行義。以婆羅門名淨行故。又施為行首故。住四攝故。多利行故。文中二。先現身相。

悉以一切上妙供具，普施眾生。所謂普雨一切上味如法飲食，一切上妙雜色寶華，一切衣服，一切瓔珞，一切

鬘帶，一切薰香，一切塗香，一切寶器，一切宮室，一切欲樂資生之具。於一切處救攝一切貧窮眾生，充濟所須，令其滿足。安慰一切苦惱眾生，獲身心樂，令其歡喜。成熟一切善根眾生，心意調柔，令其清淨，究竟無上菩提之道。如是示現，充滿十方。

後悉以下，辨其所作。文有三攝。初布施。次安慰下，愛語。後成熟一切善根下，利行。如是下，結。文並可知。

從其兩膝出現無數百千萬億諸刹帝利及婆羅門并其眷屬

相似身雲。皆悉聰慧，具諸藝業。世出世間無不通達。種種色相，種種形貌，種種衣服，上妙莊嚴，普徧十方一切世界。

二膝出剎帝利婆羅門。以其帝主，屈申自在故，行由膝故。文中亦二。先現身相。

恆以四攝攝諸眾生，謂與財寶令其富樂，可意語言令聞歡喜，或以同事勸導誘進。

後恆以下，明其所作。文中亦二。先正明。二結益。今

初。可意語言，是愛語攝，謂慰喻慶悅勝益之言。言同事者，利衰等事皆同受故。勸導誘進即是利行，謂說義利之行故。然布施是攝緣，與彼資持故。愛語是攝體，正示損益故。利行是攝處，安置善處故。同事是釋疑，令彼決定故。

如是一切，貧者令足，病者令愈，危者令安，怖者令止，有憂苦者令其快樂。復以方便咸使發心，授以正法，令其開悟。速疾令其離諸不善，集眾善法。從生死泥，拔濟令出。住真實義無畏法中。如是示現，充滿十

方。

二如是一切下，結益。於中二。先近益。後復以下，究竟益。亦重說利行。謂授以正法，即說義利之行。離惡集善，即二世樂。出生死泥，住真實義，即現法後法利行。

從其臍輪出等眾生數異道諸仙相似身雲。種種形相各別莊嚴。或服草衣，或衣樹皮。皆執澡瓶。威儀寂靜。將諸仙眾，足步虛空。往返周旋十方世界。咸出無量歌讚之聲，稱揚諸佛所有功德。或歎菩薩所修梵行，所說妙

法，所證清淨。其音和雅，美妙清徹。普聞十方，無有障礙。調伏成熟一切眾生。普攝諸根，不令放逸。令其觀察真實境界。或說諸法皆無自性，使其發起一切智心，令其安住究竟實道。或說世間資生言論，或現方域導俗軌儀，種種善巧，隨宜化度。開一切智出要法門，令諸眾生普得饒益，隨其次第，各修其業。如是示現，充滿十方。

三躋輪出仙人者。此為氣海，是吐故納新出仙之所。其所說法，多說利行。順彼仙行，以弘佛法。

從其兩脅出不思議無數龍王龍子龍女并其眷屬相似身雲。現不思議諸龍神變，徧滿虛空。所謂雨不思議寶香莊嚴雲，不思議寶華莊嚴雲，不思議寶髮莊嚴雲，不思議寶蓋莊嚴雲，不思議寶幢莊嚴雲，不思議寶旛莊嚴雲，不思議種種妙寶瓔珞莊嚴雲，不思議大摩尼寶王莊嚴雲，不思議種種寶座莊嚴雲，不思議天寶嚴具莊嚴雲，不思議天寶宮殿莊嚴雲，不思議諸天采女歌詠讚歎莊嚴雲，不思議天寶珠網莊嚴雲，不思議摩尼鬚葉臺藥寶蓮華莊嚴雲，不思議一切摩尼寶冠莊嚴雲，不思議無邊光燄天寶莊嚴雲，不思議華髮幢蓋天身莊嚴雲，不思議恭敬合掌天諸采女雲，不思議含輝吐燄金色蓮華雲，

不思議演說一切諸佛功德大音聲雲。如是一切，普徧虛空以為莊嚴。周徧十方一切世界諸佛道場而為供養。普令眾生皆生歡喜，除煩惱熱，得清涼樂。如是示現，充滿十方。

四脅出諸龍。是傍生故。

從其胸臆吉祥相中，出無數佛剎極微塵數阿脩羅王并其眷屬相似身雲。皆悉示現不可思議巧幻術力。種種神變，充滿虛空。所謂能令無量百千萬億世界皆悉震動。一切山王互相衝擊。一切海水皆大涌沸。諸天宮殿無不

動搖。諸魔光明無不隱蔽。諸魔軍眾無不摧伏。普令眾生捨離憍慢，心無放逸。除慳嫉妒，息諸怨害，咸起慈心。破煩惱山，竭愛欲海。長無鬥諍，永共和善。復以幻力遊戲神通，開悟群生，令離貪著。於諸惡法常樂遠離。怖畏生死，欣求解脫。令出世間一切諸趣。令住無上菩提之心。令修菩薩清淨妙行。令趣菩薩波羅蜜道。令入一切諸菩薩地。令照菩薩微妙法門。令觀菩薩方便善巧。如是示現，徧周法界。

五於胸德相出脩羅者。憍慢凶險，幻術所故。而於德相者，翻彰離前憍慢等故，故能降魔。

從其背出無量阿僧祇佛剎極微塵數聲聞獨覺相似身雲。為諸眾生應以二乘而受化者廣說法要，令其調伏。所謂為執我者說無有我。為執常者說行無常。為貪行者說不淨觀。為瞋行者說慈心觀。為癡行者說緣起觀。為等分者說與智慧相應境界。各別對治，令徧觀察。為於境界生樂著者，說離諸著無所有性。為徧耽滯五欲境界，說離諸欲無染著性。為著寂靜定所繫者，說大願門，令深愛樂。誓普饒益一切眾生，轉於法輪，盡未來際，令諸眾生所願皆滿。如是徧周一切法界。

六背出二乘者。背於大乘，失佛意故。杜塞諸根，不見

法故。所說法中，文有十句。前八順二乘法。後二反二乘法。九二乘趣寂，令起大願。十二乘自利，令普饒益。前九對治。後一生善，令其見現。

從其兩肩出阿僧祇佛刹極微塵數夜叉羅刹王。種種形貌，種種色相。長短廣狹，種種儀容。威勢雄猛，甚可怖畏。無量眷屬而自圍繞。現種種神力。吼種種大聲。隨其所應，作種種方便。徧滿十方一切世界。守護一切善行眾生，及諸賢聖菩薩眾會說法道場。諸有受持菩薩淨行，欣求如來一切正智，若向正住及正住者。或時現作執金剛神，守護諸佛，承事供養，及佛住處。或徧守

護一切世間，令其不入一切惡道。有恐怖者，令得安隱。有疾病者，令得除差。在厄難者，令除苦惱。有過惡者，令自厭悔。有災橫者，令其息滅。積集福智大心眾生，令其能轉諸佛法輪，捨生死輪，住正法輪，摧滅一切異道邪論。如是利益，徧滿十方一切法界。

七肩出夜叉。肩是勇力，可畏所故。多現神力，又能荷負，故為守護。

從其腹出無量百千阿僧祇佛剎極微塵數緊那羅王。各與無數百千萬億緊那羅女眷屬圍繞。無量佛剎極微塵數乾

闍婆王，各與無數百千萬億乾闥婆女眷屬圍繞。各奏無數阿僧祇百千天樂，歌詠讚歎一切諸法緣生實性。歌詠讚歎一切諸佛難思功德。歌詠讚歎發菩提心普徧威力。歌詠讚歎一切菩薩修圓滿行。歌詠讚歎一切諸佛成正覺門。歌詠讚歎一切諸佛轉法輪門。歌詠讚歎一切諸佛現神變門。歌詠讚歎一切諸佛般涅槃門。歌詠讚歎守護一切諸佛教門。歌詠讚歎令諸眾生皆歡喜門。開示演說嚴淨一切諸佛剎門。開示演說一切諸佛微妙法門。開示演說照一切法無障礙門。開示演說發起一切諸善根門。如是利益，充滿十方。

八腹出緊那羅及乾闥婆者。鼓腹絃歌，樂者所故。故多讚詠諸佛法輪。

從其面門出無量百千阿僧祇佛剎極微塵數轉輪聖王。七寶具足，四兵圍繞。

九面門出輪王。布十善令向佛法故。文中二。先現身。

放大捨光，雨無盡寶，最勝摩尼莊嚴世界。普施眾生，咸令充足。令斷十惡，修行十善。

後放大捨下，所作。於中三。一總標。二別顯。三總結。今初，先以財施。後以法施。

所謂一切屠獵漁捕暴惡眾生，令起慈悲，不斷生命。貧乏苦惱下劣眾生，令其永捨不與取行，常行惠施。能捨無量百千萬億端正采女心無吝惜，令諸眾生永斷邪淫，修持梵行。虛誑眾生，令其究竟常真實語，不作虛誑無益談說。令攝他語，不行離間，常樂和合，無有乖諍。令柔軟語，無有麤惡雜穢語者。令常演說甚深決定明了之義，順佛法語，利益修行，永斷綺飾無義言辭，令諸眾生深入法句。多貪欲者，令其少欲，修習知足最勝端

嚴無生正行。多怒害者，令除瞋恚，於諸眾生恆起慈心，心無瑕垢，為說大悲，歡喜攝受令入佛法。墮見網者，為說實義，令觀諸法深入因緣，善明諦理，決擇正邪，令心清淨，拔邪見刺，破疑惑山，令諸眾生悟心實性，具足通達趣入甚深，一切障礙悉皆除滅。

二所謂下，別顯之中，即廣前法施。斷十種惡，成十善故。即為十段。文皆有二。先舉所斷，即是十惡。後明能斷，即是十善。能斷之中，文皆有二。一對治離。二果行離。身三之中，兼有因離。今初離殺，先舉所離。

後令起慈悲下，能治之善。此句即是辨對治離。不斷生命，即果行離。攬因成業，名為果行。今不成業，即名為離。若因貪行殺，由前施財而不行殺，即是因離。二貧乏下，即不盜善。貧乏苦惱此是盜因，是所離惡。由前大捨令彼不盜，即是因離。令其永捨不與取行，即果行離。常行惠施，即對治離。三能捨無量下，離邪行善。先舉輪王捨女之行，令邪行者得成因離。以無妻妾為邪行因，與之便離。前盜戒中舉其貧窮以為盜因，此舉施采女以為離因，文影略耳。令諸眾生永斷邪淫，即果行離。修持梵行，即對治離。四虛誑下，是離妄語。

此句所離。令其究竟常真實語，即對治離。不作虛誑無益談說，即果行離。五令攝他語下，不離間善。此句即是對治離也。但欲攝他，豈有離間。不行離間，即果行離。常樂和合，亦對治離。無有乖諍，亦果行離。新舊併出，所以有重。六令柔軟語下，不惡口善。此對治離。無有麤惡雜穢語者，即果行離。七令常演說下，不綺語善。初對治離。永斷已下，即果行離。令諸眾生深入法句，復是對治。亦是成益。八多貪欲下，無貪善也。此句所治。意三離中但有對治。以貪瞋等業有之本，更無所依。故非果行。不同前七攬貪等因，成殺等

業故。既非果離，不可對之更立異因，故無因離。不同殺等瞋殺具等皆為因故。令其少欲下，即能對治。九多怒害下，即不瞋善。十墮見網下，即不邪見。

如是所作，充滿法界。

後如是下，結用周徧。

從其兩目出無量百千阿僧祇佛刹極微塵數廣大日輪。放大光明。普照一切諸大地獄，所有苦惱悉令除滅。又照一切世界中間，令除黑闇，睹見光明。又照一切十方世

界餓鬼傍生，令其捨離愚癡翳障，得大智慧，拔除眾苦。復於一切垢濁世界放清淨光，白銀世界放黃金光，黃金世界放白銀光，琉璃世界放玻璃光，玻璃世界放琉璃光，硨磲世界放瑪瑙光，瑪瑙世界放硨磲光，赤珠世界放日藏摩尼王光，日藏摩尼王世界放赤珠光，帝青世界放月藏燄網摩尼寶王光，月藏燄網摩尼寶王世界放帝青光，純寶所成世界放雜寶光，雜寶所成世界放純寶光。如是光明，普照佛剎道場眾會而作佛事。照諸眾生心之稠林。辦諸眾生無量事業。嚴飾一切世間境界。令諸眾生心得清涼，生大歡喜，安隱快樂。如是所作，充滿法界。

十日出日輪。等日照故。故其所作，放事光法光。

爾時海幢比丘從其眉間白毫相中，出無量百千阿僧祇佛剎極微塵數帝釋天王。威德光明，超過天眾。捨離世間一切欲樂。於諸境界而得自在。摩尼寶珠以繫其頂。身光映蔽諸天宮殿。

十一眉間出帝釋者。地居天中最高勝故。中道般若，是曰眉間。令離五欲，故稱白毫。文中二。先現身。

震動一切須彌山王。覺悟一切放逸天眾。歎福德力。說

智慧力。生其樂力。持其志力。增其所有清淨念力。堅其所發菩提心力。讚樂見佛，令除世欲。讚樂聞法，令厭世間。讚樂觀智，令絕世染。止脩羅戰，斷煩惱諍。滅怖死心，發降魔願。興立正法須彌山王。成辦眾生一切事業。念念調伏無量眾生。如是所作，周徧法界。

後震動下，明所作。皆是對治天過患法。

從其額上出無量百千阿僧祇佛刹極微塵數諸梵天王。色相端嚴，世間無比。威儀寂靜。言音美妙。請佛轉法。歎佛功德。令諸菩薩心生歡喜。能辦眾生無量事業。如

是普徧十方世界。

十二額出梵王者。梵王超欲，次於眉上。又是稽顙請法所故。

從其頭上出無量百千阿僧祇佛刹極微塵數諸菩薩眾。皆以相好莊嚴其身。其諸菩薩，各於其身肢節毛孔，一切普放大光明雲。顯現諸佛往昔所行菩薩行海，宣說菩薩種種妙行。

十三頭出菩薩。最上首故。文中二。先總明現身作用。

所謂普徧十方一切世界，稱揚讚歎一切諸佛往昔所行檀波羅蜜，施者受者及所施物，并所隨順相應行海。示導一切慳吝眾生永離慳著，成就捨心，常行惠施，攝取眾生，令住無上檀波羅蜜。顯示諸佛相好功德，令得眾寶莊嚴世界。及示依正所出生因，令諸眾生愛樂修習。

後所謂下，別明肢節毛光演法。即十度行。皆以普徧十方一切世界而為段初。一一度中，文皆有二。先總。後別。今初。檀度二者。先至相應行海，總標。若事若理，皆深廣故。下九例然。後示導下，別顯。於中三。

初明成益。謂除蔽成行故。二顯示下，示度果相。謂依正果故。普眼長者云，為欲令其具佛相好莊嚴色身，稱揚讚歎檀波羅蜜。據此十度皆有身果。文或闕略。依果可知。三及示依正下，結度成因。

普徧十方一切世界，稱揚讚歎一切諸佛往昔所行尸波羅蜜，并所隨順相應行海。令諸眾生於五欲境，深生厭離。於諸佛境專意趣求。除顛倒想，恆正思惟。斷邪分別。永離諸惡。念菩薩戒。攝諸眾生住大慈悲。稱讚解脫，護持如來究竟戒品。普令眾生住於佛戒。說一切有悉皆如夢。了達諸法自性皆空。說諸欲樂無有滋味。令

諸眾生遠離欲縛，出煩惱垢。

二戒度中亦二。先總。後令諸眾生下，別。文亦分三。初辨成益。即成三聚益。初成律儀，具於止作。次念菩薩戒下，成攝眾生。後稱讚解脫下，成攝善法。二普令眾生下，示戒之果。準普眼處，即是清淨無垢法身。既令生住，亦是益相。三說一切有下，示戒之因。有智慧人了欲無味，方能持故。亦攝慧善。

普徧十方一切世界，稱揚讚歎一切諸佛往昔所行忍波羅

蜜，并所隨順相應行海。令諸眾生得法自在，得心自在。具忍辱力。稱揚讚歎金色身業。離瞋恚垢，起慈悲行。止殺害心，絕畜生道。

三忍度中，先總明。令諸眾生下，別顯。於中亦三。初成忍行。二稱揚下，顯忍因果。三止殺害下，治不忍因。

普徧十方一切世界，稱揚讚歎一切諸佛往昔所修勤波羅蜜，并所隨順相應行海。令諸菩薩精進勇猛，為一切智勤求正法。供養承事一切如來。恭敬讚歎，心無疲厭。

令諸世間不起放逸。攝取眾生令離苦蘊，入佛究竟圓滿智海。

普徧十方一切世界，稱揚讚歎一切諸佛往昔所修禪波羅蜜，并所隨順相應行海。令其散滅塵勞障翳。永捨憍慢，不起貪瞋。蔭清涼雲，除煩惱熱。竭生死海，摧業結山。調伏眾生安住妙法。究竟令其心得自在。

普徧十方一切世界，稱揚讚歎一切諸佛往昔所修般若波羅蜜，并所隨順相應行海。普耀正見智慧電光。令諸眾生照達本性。普震清淨妙法雷音，令諸眾生增長功德。

摧滅一切我慢高山，拔出一切諸見毒箭，抉除一切疑惑翳膜，令諸眾生得自在智。

普徧十方一切世界，稱揚讚歎一切諸佛往昔所修方便波羅蜜，并所隨順相應行海。隨順世間種種所作，令諸眾生究竟成熟。雖普調伏一切眾生，而於眾生無所染著。雖普照明諸佛眾會，而於眾會心無所著。雖離生死，而於諸趣自在受生。雖現世間，而於涅槃入出自在。雖能了達生死涅槃無二無別，而常善巧饒益眾生。安住菩薩圓滿自在。超出世間，到於彼岸。

四精進，五禪定，六般若，七方便，文並可知。

普徧十方一切世界，稱揚讚歎一切諸佛往昔所成願波羅蜜，并所隨順相應行海。令諸菩薩盡未來際，乘四願輪，遊正覺路。徧周剎海，利樂眾生。摧無明山，裂愛欲網。解眾結縛，永滅無餘。示現神通種種變化，令諸眾生壽命自在。

八願度中云四願輪者，即四輪乘。謂一住好國土。二依止善人。三發大誓願。四集勝福德。以能摧障，故名為輪。前二是果。後二約因。就二因中，福是福因，願是

智因，故為主導。此四各具五種因緣。一住好國土五因緣者，一者易求，謂四事易故。二者善護，王如法故。三者善地，處調和故。四者善伴，同戒見故。五者善寂，無誼聲故。二依止善人有五緣者，一多聞。二見諦。三巧說。四憐愍，不貪利故。五不退，無疲倦故。三發大誓願五因緣者，一善緣，妙法為緣故。二善聚，具福智故。三善修，止觀諸行相應修故。四善說，無求利故。五善出，所有上法恭順修故。四集勝福德輪五因緣者，一可樂，由住勝世以為因故。二無難，由值善人以為因故。三無病。四三昧。五智慧。此三以大願輪而

為因故。以此四輪遊正覺路，至涅槃城。以願為主，故稱願輪。願度中說。

普徧十方一切世界，稱揚讚歎一切諸佛往昔所成力波羅蜜，并所隨順相應行海。演說菩薩大總持力，方便法音，妙辯才力。成熟眾生廣大願力。摧伏魔怨智自在力。制諸外道心無畏力。身力堅固，猶若金剛。能碎一切大鐵圍山。能滅十方一切劫火。能竭海水。能吞猛風。掌擎盡空所有世界，而於身力無有損減。令諸眾生淨治三昧，普於一切自在受生。

普徧十方一切世界，稱揚讚歎一切諸佛往昔所修智波羅蜜，并所隨順相應行海。分別演說種種智地。所謂普生諸佛十力無畏一切功德具足智地，普滿諸佛一切相好自在莊嚴具足智地，普發菩薩一切大願具足智地，普徧攝受一切眾生具足智地，普為眾生顯示無我具足智地，普徧觀察一切眾生種種心念具足智地，普徧分別一切眾生根解差別具足智地，普徧隨順一切眾生信樂差別具足智地，普徧了知一切眾生甚深業海無量差別具足智地，普徧趣入一切眾生無量願海心樂差別具足智地。

九力度，十智度，文並可知。

從其頂上肉髻之中，出無量阿僧祇佛剎極微塵數如來之身。其身最勝，世無能比。諸相隨好，清淨莊嚴。威光赫奕，如真金山。無量光明普照十方。演妙圓音，普周法界。示現無量大神通力。

十四頂出諸佛者。最極無上故。文中二。一明現身。

為諸世間普雨法雨。隨其所應，皆令獲益。

二為諸世間下，彰所說法。於中三。初總標。次別顯。後結周徧。今初可知。

所謂為坐菩提場諸菩薩，雨大法雨，名平等現前智。

二所謂下，別顯。總有三十二法雨，大分為二。前十二為菩薩。餘為雜類。前中三。初一為等覺。次十為十住。後一為十信。今初，法門名平等現前智者，略有三等。一始覺同本覺，無復始本之異，即理智平等。二等同諸佛，證無差別故。三等同眾生，無異性故。得此三等，便證佛智，故云現前。

為灌頂位諸菩薩，雨大法雨，名普門法界。為法王子位諸菩薩，雨大法雨，名入諸菩薩普莊嚴門。為童真位諸

菩薩，雨大法雨，名住堅固山大法智雲。為不退位諸菩薩，雨大法雨，名普徧莊嚴平等海藏。為成就正心位諸菩薩，雨大法雨，名以金剛智普照境界。為方便具足位諸菩薩，雨大法雨，名普攝眾生自性莊嚴門。為生貴位諸菩薩，雨大法雨，名如來圓滿隨順世間。為修行相應位諸菩薩，雨大法雨，名演法本際悲愍世間。為治地位諸菩薩，雨大法雨，名積集法藏。為初發心諸菩薩，雨大法雨，名普攝眾生平等莊嚴。

二為灌頂下，有十法雨。即是十住。從於等覺便至住者，圓教位中，十住位滿，便成佛故。此前更無地等諸

位。此約以位攝位。以得初住，即得初行，第一迴向，及初地故。十住滿時，行向與地，一時皆滿。如五味精香，五味齊燒，五味齊盡。然此十法，皆是當位勝進十法。已住自分，勸修進故。普門法界者，此位自分已成十智，而未得普。是故令學如來十智。謂三世法界乃至無邊，故名普門。法界乃是十中二義。謂法界無礙智，法界無邊智故。二入諸菩薩普莊嚴門者，學法王處善巧等法，為莊嚴故。門字義來。三堅固山者，令學知剎乃至供佛皆無能壞，最高出故。其法智雲，乃是梵本十雨總名。四海藏者，令學勝進，說一即多，說多即一，文

隨義等，十種廣大甚深法故。梵本脫此，海藏舊有，餘皆義生。五以金剛智等者，照一切法無相無體乃至一切無分別等，是金剛智。六自性莊嚴門者，知眾生無邊，乃至知眾生無自性，皆是自性門。以自性門總該餘九，既稱方便故普攝眾生。七圓滿隨順世間者，了知圓滿三世佛法，皆是順世。八悲愍世間者，觀察眾生界等為悲愍故。梵本闕修行住菩薩法門及治地位名。其演法本際，即治地法門。今合在此。九積集法藏者，全依舊經。謂誦習多聞，虛閑寂靜，近善知識等，皆為積集包藏行法，故稱為藏。十普攝眾生者，令其勤供養佛，主

導世間為普攝故。若作十地釋者，十地祈佛種智故，故云普門。九地當法師位，知根器等，名為莊嚴。八地不動故稱為堅，高出分段故名為山。七地權實雙行深廣名海，功用已滿故稱為藏。六地般若現前為金剛智。五地即真入俗為自性嚴。四地初寄出世，不壞菩薩道為隨順世間。三地廣求多聞，本為悲故。二地普攝五重十善，名為積集。初地創成二利，慈悲觀增。

為廣大信解諸菩薩，雨大法雨，名如來願藏無盡解脫。

三為廣大信解下一門，為十信菩薩。令發大願普緣如來及於普賢無盡境界，而生信心。信含眾德，故稱為藏。若前是十地，此即三賢。地前亦名為信地故。

為無色界諸天，雨大法雨，名普門智無盡藏。

二為無色界下二十法雨，普為人天一切雜類。於中分四。初一無色天。次一色天。三有六法，欲天。四有十二法，為八部六道。今初。普門智無盡藏者，初之二天，雖作空識無邊行相，或內或外，亦非普門。三欲亡

識，四欲亡想，意欲求盡。今乃令其內外普觀，不盡心想，而見真性無邊無盡。

為梵世諸天，雨大法雨，名無量教聲普門智藏。

二為梵世者，四禪之內皆有梵王，通稱梵世。故舊經云為諸梵天。法門名為無量教聲等者，初禪言聲不及眾外，二禪已上無有言聲，故令無量，捨外住內，令得普門。然是定地，令具智藏。

為他化自在天，雨大法雨，名能生法力資具無盡藏。為

諸魔眾，雨大法雨，名種種心幢勤求一切智。為化樂諸天，雨大法雨，名淨念智寶住種種善軛。為兜率諸天，雨大法雨，名菩薩生意種種願寶幢。為夜摩諸天，雨大法雨，名隨順如來淨念歡喜藏。為忉利諸天，雨大法雨，名疾見如來出生莊嚴愛樂藏。

三為他化下，六法為欲界天中。初一他化。能生法力資具無盡藏者，雖令他化，猶尚有盡。為佛法力，則無盡矣。二就他化中分出魔天。魔好摧他，自高為主。令求種智，高出為幢。則摧邪慢種種心幢。三化作樂具，但

汙自心。令住善軌，則淨念圓智。四雖世樂知足，須生出世諸智願意，圓明高出。五隨時受樂以自慶快，令順如來淨念法喜。六忉利諸天耽著愛欲，令速見佛樂法莊嚴。

為諸龍王眾，雨大法雨，名出生菩薩厭離龍趣種種神變歡喜幢。為夜叉王眾，雨大法雨，名見佛歡喜普徧法界如來神變藏。為乾闥婆王眾，雨大法雨，名一切如來集法音聲雲。為阿脩羅王眾，雨大法雨，名金剛智輪大法境界。為迦樓羅王眾，雨大法雨，名無邊光明出生一切如來方便。為緊那羅王眾，雨大法雨，名一切如來饒益

世間殊勝智雲。為摩睺羅伽王眾，雨大法雨，名愛樂速疾增長法。為諸人王眾，雨大法雨，名得一切眾生勝智慧法。為地獄眾生，雨大法雨，名寂靜音聲正念莊嚴。為畜生眾生，雨大法雨，名隨順如來具智慧藏無惡業道聲。為閻羅王界眾生，雨大法雨，名不捨眾生出生如來波羅蜜聲。為諸厄難處眾生，雨大法雨，名寂靜音聲普遍安慰，悉令眾生永離憂苦，咸得入於賢聖眾會。

四為諸龍王下十二法雨，為八部六道。然忉利天後合有四王。欲為八部，故不出之。含在前三，從所統為名。龍即西方。夜叉是北。乾闥婆是東。欠於南方。鳩盤荼

王大同夜叉，故合為一。今初。龍王法門名出生菩薩等者，諸龍變現，雖得自在。不及菩薩威力難思。今出生此，便摧龍苦。二夜叉暴害，故令歡喜。此類捷疾，令得如來普徧神變。三彼善奏樂，令集法音。四金剛智輪，摧彼我慢。大法境界，過彼大身。五彼淨眼觀海，意欲吞龍。今慈眼慧光，觀方便海，救人天龍。六彼雖善歌，無益於世。今詠勝智，饒益世間。七蟒多毒害，令其愛樂。宛轉腹行，令疾增長。八人王智明，統御萬國。令以勝智，普攝眾生。九地獄眾生，多聞毒害號歎之聲，令得寂靜。身受多苦，心念彌惡。故令正念三寶

以為莊嚴，眾苦自息。十畜生癡故，惡業致故。十一閻羅鬼卒，貴欲治人。令迴此心，不捨一切。迴彼訶責，為彼岸音。十二處於厄難，不聞惡聲，唯聞安慰，自離憂苦，捨惡聚會，賢聖為儔。

如是所作，充滿十方一切法界。

三如是所作下，總結周徧。

海幢比丘各於其身一切毛孔，一一皆出無量阿僧祇佛剎極微塵數大光明網。一一光明，具阿僧祇色相。一一色

相，有阿僧祇莊嚴。一一莊嚴，現阿僧祇境界。一一境界，辦阿僧祇事業。如是普徧十方法界。

第三海幢比丘各於其身一切毛孔下，通顯毛光業用。於中二。先總明。

爾時善財復於如是大光網中，悉見海幢往昔所修一切菩薩三世所行檀波羅蜜，悉捨一切內外所有圓滿施行。

後爾時善財下，別見光中本事。此下一段四十七行舊經所無。是新梵本。大同喜目毛孔所流。文中十度，各以

往昔所修一切菩薩而為段初。皆先標，後釋。釋中含因果等寬狹不同。一檀波羅蜜，總說橫具。

往昔所修一切菩薩三世所持尸波羅蜜，從初發心，盡未來劫，誓捨身命，不起一念毀犯之心。

二者戒度，豎明微細。此二文略。

往昔所修一切菩薩三世相應忍波羅蜜，或遇損害頭目手足，斷截肢節，惡言毀辱，悉能安受，無有動亂。恆思捨離怨害之心。觀自他身，無有我相。生大慈悲，成一

切智。以是因緣，獲得菩薩具足相好自在色身。示一切身於一切處，經一切劫受一切苦，勤求正法，利益眾生，不起一念厭退之心。種種神變普徧十方等眾生界現一切身，如影隨形，充滿法界。

三忍中有二。先因，後果。今初。內中具足三忍。初耐怨害忍。次悉能安受無有動亂，即安受苦忍。仍前而起。欲明一忍具三忍故。後恆思下，諦察法忍。二以是因緣下，得忍之果。

往昔所修一切菩薩三世所行動波羅蜜，所學三世諸佛菩

薩勇猛精進離相妙行，所現種種神通變化，震動十方一切世界諸大海水。令諸眾生精勤匪懈，厭生死海，出離魔界。一切外道無不怖懼，一切魔軍無不摧碎。光照十方一切法界，令諸菩薩修種種行，種種神變，普利眾生。

四進度中，初明攝善，後令諸眾生下，利樂精進。略無被甲。

往昔所修一切菩薩三世所求禪波羅蜜，或見受身生諸族姓，或為國王，遇善知識，發菩提心，厭棄國城，出家

學道，立大誓願，種種威儀，堅持禁戒。身心寂靜，修諸禪定。

五禪度中，通相而說。

往昔所修一切菩薩三世所成般若波羅蜜，為欲開發一切智故，勤求佛法，生正見心。為欲拔濟諸眾生故，事善知識。親近承事。不違言教。尊重恭敬，深生信心。禮拜供養，情無懈倦。勤求如來一句正法，徧捨一切內外所有，於身命財心無吝惜。乃至勤求一切法句亦復如是。如是念念盡未來際，諸所修行皆為成就一切眾生，

究竟圓滿智慧業故。

六般若中，依唯識論十度明義，般若唯有無分別智。今經宗中般若亦具有分別智，但有兼正，故此度中多說加行。

往昔所修一切菩薩三世相應方便波羅蜜，能於一切諸趣類海普現一切眾生色相相似身雲，以種種威儀善巧攝受，普令眾生獲大饒益。

七方便中，但有拔濟。

往昔所求一切菩薩所發三世願波羅蜜，所謂供事一切諸佛願，成熟一切眾生願，嚴淨一切佛刹願，如是所發一切誓願圓滿修行所成功德，具足一切如來相好，修諸對治一切善法，滅除一切生死過患，盡未來劫利益眾生誓願無盡。

八願度中，先略標三願。初後求菩提，中一利樂他。後如是下，顯示願果。

往昔所修一切菩薩三世相應力波羅蜜，所謂出生大願力，普供諸佛力，普淨佛刹力，普修妙行力，普化眾生

力。

九力度中，正說修習，含於思擇。

往昔所修一切菩薩三世所行智波羅蜜，恆以一切微細境界圓滿智力啟悟法界一切眾生，無明睡眠咸令開覺，究竟出生一切智道。

十智度中，通說二智，謂以受用法樂智成熟眾生。上來第三毛光業用竟。

海幢比丘各於其身，從足至頂，乃至一切毛孔之中所現境界。善財童子於念念中，無不明見。

第四海幢比丘下，總結令睹。

爾時善財一心觀察海幢比丘，深生渴仰。

第三爾時善財一心下，瞻敬證入。於中二。初總明。後別顯。今初。亦是思人，證人法界。

憶念彼不思議三昧解脫。隨順彼不思議三昧自在。思惟

彼不思議利益眾生巧方便海。深入彼不思議無作妙用普莊嚴門。愛樂彼不思議甚深信解清淨境界。觀察彼不思議莊嚴法界清淨智。安住彼不思議受佛究竟加持智。出生彼不思議菩薩自在力。堅固彼不思議菩薩大願力。增廣彼不思議菩薩諸行力。

次憶念彼不思議三昧下，別有十句。並是思法，證法法界。文有二意。一約能證思入等殊。二約所證善巧等別。十種所證，一一皆用十句能證。文影略耳。初二句總，故有三昧之言。解脫是體，自在是用。於此體用，

憶念明記，隨順修行。別中，三思惟利生善巧。四證入無作妙用。五愛樂勝解清淨。六觀察能嚴之智。七安住外得佛加。八出生自力無礙。九堅固所起大願。十增廣諸行所成。

如是住立思惟觀察，一日一夜，乃至經於七日七夜，半月一月，乃至六月復經六日。

第四如是住立下，所經時分。六月六日者，第六住中滿六度故。法味資神，心境都寂。豈有身相時節短長。縱

六十小劫亦應忘倦。但取起時，故言六月。彰所表耳。
過此已後，海幢比丘從三昧起。

第二過此已後下，起定問答。於中三。一睹起定。

善財爾時以身布地，恭敬作禮，起立合掌，歎未曾有。

二善財爾時下，申敬讚。於中初申敬。

讚言，聖者，如此三昧希有奇特。此三昧門最為甚深。

此三昧門最為廣大。此三昧門境界無量。此三昧門神變難思。此三昧門光明無等。此三昧門莊嚴無數。此三昧門威力難制。此三昧門境界平等，不動不亂。此三昧門普照十方一切世界。此三昧門方便無量，有勝堪能。

次讚言下，標讚。

所以者何。如此三昧利益無盡。以能除滅一切眾生無量苦蘊故。所謂能令一切眾生斷貧窮業故。出地獄苦故。免畜生趣故。絕餓鬼因故。閉諸難門故。開人天道故。親近一切安樂法故。出生人天殊勝樂故。令其愛樂定境

界故。能令增長有為樂故。能為顯示勤求出離三界法故。能為引發勤求無上菩提心故。能使增長大福智聚出生因故。能令速疾增長廣博大悲心故。能令出生廣大願力故。能令照明菩薩智道故。能使莊嚴波羅蜜道故。能令深入最勝大乘故。能令明了普賢妙行故。能令趣入諸菩薩地智光明故。能令積集成就菩薩諸願行故。能令安住一切智智境界中故。能令清淨一切菩薩變化力故。能令勤求一切加持自在力故。

後所以者何下，徵釋。

聖者，此三昧門名為何等。

三聖者此三昧門名為何等下正明問答。於中有二問答。先問答名。後問答用。前中，先問。後答。今初。上雖修入，容未知名。如得王膳，何必能識。

海幢告言，善男子，此三昧名普眼捨得。亦名般若波羅蜜境界清淨光明。亦名平等清淨普莊嚴門。

後海幢下，答。先答主名，後攝眷屬。今初，而有三名者，初一唯從智立。次一雙就境智。後一雙融境智。初

言普眼捨得者，般若之智照一切法，故名普眼。皆無所得，故云捨得。若有所得，不能即寂而起大用。以無所得，即無所不得。菩薩無得，心無罣礙。諸佛無得，則得菩提。昔云，障無不寂曰捨，理無不證曰得。非無此理，而未造玄。二亦名般若波羅蜜境界清淨光明者，般若清淨故境界清淨。清淨之境皆般若境，故云光明。三亦名平等清淨普莊嚴者，般若了境，無境非般若，何所不嚴。故智論云，說智及智處，俱名為般若。是則若般若清淨，若境界清淨，無二無二分，無別無斷故。故一莊嚴一切莊嚴，名普莊嚴。亦一般若已具諸度為莊嚴

故。

善男子，我以修習此平等清淨普莊嚴門而為上首，具足圓滿百萬阿僧祇最勝最尊無比三昧。

二善男子下，明攝眷屬可知。所以次前明此門者，般若導行，一攝於餘，莫先此故。

善財白言，聖者，此三昧境界究竟唯如是耶。

二善財白言下，問答大用。先問。後答。問中云唯如是

者，上所目睹，頗已修入。視聽之外，更希異聞。

海幢言。善男子，此三昧門境界甚深廣大無量。若有修習身心寂靜入三昧時，了知十方一切世界無所障礙。往詣十方一切世界無所障礙。入出十方一切世界無所障礙。莊嚴十方一切世界無所障礙。修治十方一切世界無所障礙。嚴淨十方一切世界無所障礙。

後海幢下，答中，皆示上來之所不及。於中三。初明於器世間無礙。

見一切佛普徧十方無所障礙。觀一切佛廣大威德無所障礙。知一切佛遊戲神通無所障礙。證一切佛甚深智力無所障礙。入一切佛大功德海無所障礙。與一切佛無上法雲無所障礙。受一切佛無量法雨無所障礙。於諸佛法修習妙行無所障礙。知一切佛轉妙法輪平等智性無所障礙。入一切佛道場眾海現神通力無所障礙。隨順十方一切諸佛所起妙行無所障礙。觀察十方一切諸佛演說妙法無所障礙。普入十方一切佛刹咸起神通無所障礙。

次見一切佛下，於智正覺世間無礙。

大悲攝受十方眾生令其出苦無所障礙。常起大慈充滿十方與眾生樂無所障礙。普見十方一切諸佛心無厭足無所障礙。普入十方一切眾生種種解海無所障礙。普知十方一切眾生種種根海無所障礙。普知十方一切眾生種種業海無所障礙。

後大悲攝受下，於眾生世間無礙。

善男子，我唯知此般若波羅蜜清淨光明三昧法門。如諸菩薩摩訶薩所入甚深究竟智海，所淨最勝諸法境界，所達一切諸佛法門，所往十方無量佛剎，所有大智總持光

明，所住圓滿自在三昧，所現清淨種種神通，所具無盡辯才大海，所得無畏美妙音聲善巧宣說諸地功德，所能擁護一切眾生。而我何能知其妙行，歎其功德，顯其境界，讚其願力，現其光明，入其度門，達其所證，集其勝業，了其次第，如其普徧，住其三昧，見其心境，說其正道，辨其威勢，得其所有平等智慧。

第三善男子我唯下，謙已推勝。

善男子，從此南行至海潮處。彼有大城，名圓滿光。其城有王，名妙圓光。於彼城東有一園林，名普莊嚴。王

有夫人，名伊舍那，為優婆夷。止住此林，修菩薩行。汝往彼問，菩薩云何學菩薩行，修菩薩道。

第四善男子從此下，指示後友。海潮處者，謂潮所至處，方便就機，不過限故。臨生死海，以濟物故。能知三世佛法海故。城名圓滿光者，般若已圓，便能涉有，為圓滿光。故聞有佛及無佛等，心不退轉。有王名妙圓光者，圓照萬法。王有夫人即是般若，依此圓照成於不退。園名普莊嚴者，相有眾嚴，以表生死而為園苑萬行嚴故。又文隨義義隨文等，莊嚴總持無漏法故。友名伊

舍那者，舊云休舍。或云呼舍。此方並翻為普希望。亦云滿願。謂隨物希望得圓滿故。亦能圓滿性相法故。前般若了真，故寄比丘。今慈心入俗，故寄於女。

時善財童子於海幢比丘所，得最勝法，獲堅固身。證三昧境，究竟明徹。住清淨解，悟深法界。其心隨順諸佛教海。於諸法門，憶持不忘。安住廣大普莊嚴門。智慧光照充滿十方。心生歡喜，踊躍無量。五體投地，禮海幢足。繞無量匝，重復頂禮。恭敬瞻仰，思惟觀察。想其容止。持其名號。念其功德。觀其行願。憶其言音。思其三昧。想其所行廣大境界。受其所得總持智慧清淨。

光明。咨嗟戀慕，辭退南行。

禮辭可知。

淨空法師專集網站(簡)製作